

**На хвалитех стихирь новомучеником, глас 8. Подобен:** О, преславнаго чудесе:

**О, преславнаго чудесе! / В последня времена возсиявают мученицы / и прелести мрак отгоняют, / вера христианская ныне возвышается / и падает нечестие, / радуются вернии / и праздник новоявленным составляют, / вопиюще Христу Богу: / мучеников похвала и победа Ты еси, Всесильне.**

*Творение святителя Афанасия Ковровскаго.*

**Веры бронями, / и щитом благодати, / и креста копием вооружившися, / сопротивным силам непобедими бысте / и, яко Божественнии храборницы, / демонская ополчения победивше, / со ангелы ликуете, / верныя же заступаете, и освящаете, / и спасаете, призываемии.**

*Творение святителя Афанасия Ковровскаго.*

**О, преславнаго чудесе! / Чудес светлостью / солнца светлейше / присно святии сродницы наши / светят концем Русския земли, / от не вечерняго Света облистаеми, / ихже сиянии / облацы от страны нашея отгоняются варварстии / и демони побеждаются.**

**Слава, глас 6:**

**Новоявленные звезды днесь / на церковней показашася тверди, / во мнозех местех бывшии мученицы Христовы, / ихже ублажающе, мучениколюбцы, / по долгу им прирцем, глаголюще: радуйтесь, благочестия утверждение и нечестия обуздание; / радуйтесь, Российския Церкви славо и безбожных посрамление; / радуйтесь, образи терпения и за Христа страдания. / Станите, непобедимии, посреде нас умне, / от бед и искушений избавляюще, / и молитесь о спасении душ наших.**

*И ныне, Богородичен.*

## **НА ЛИТУРГИИ**

Прокимен, Апостол, Евангелие и Причастен воскресны гласа.

*И новомучеником прокимен, глас 7:*

**Бог нам прибежище и сила, / помощник в скорбех, обретших ны зело.**

Стих: Помощник в скорбех, обретших ны зело.

Апостол к Римляном, зачало 99 (гл. 8, 31-39).

Евангелие от Луки зачало 105-106. Конец: В терпении вашем стяжайте души ваша (гл. 21, 8-19).

*Причастен:* Радуйтесь, праведнии, о Господе: